

E UNICO AÑA CU "WATTY" A KEDA SIN DRENTA PARLAMENTO

Despues di problema den MEP cu Watty y Delwyn Gomez, Watty Vos a lanta su partido R.U.B.A. y a participa cu esaki den eleccion 1977 cu tabata eleccion pa staten.

Apesar di a haya 3829 voto, y cu Watty a logra 2574 voto, mas cu den eleccion anterior cu el a logra 2206 pa Staten y 2219 pa Eilandsraad, R.U.B.A. no a haya suficiente pa asiento.

E tabata sinembargo nr. dos den voto tras di Betico Croes cu a kibra tur record cu e acumulacion di 8156 voto.

Na di 3 lugar den voto a keda lider di PPA Guillermo Trinidad cu a ricibi 2436 voto compara cu su 229 anterior.

Leo Chance a sigui cu 1944 voto pa PPA contra 2861 na 1973 y 767 na 1975.


Den MEP, Charo Kelly a bira di dos personahe di voto cu su aumento di 489 den 1973 pa 1288.

Esun cu a perde mayoria di e votonan cu Charo Kelly a ricibi, tabata veterano Frans Figaroa cu a cay di 1258 pa 477 voto.

Diputado di agricultura di MEP Daniel Leo tambe tabata tin efecto riba eleccion subiendo di 919 pa 1191 voto.

Nelson Oduber cu a debuta na 1975 cu 268 voto a subi pa 1069.

MEP a ricibi 17.112 voto y gana 5 asiento.



Den R.U.B.A. tabata remarkable cu **Rudy Frank**, un tempo e homber fuerte di AVP, a cay di 706 voto di eleccion anterior pa 210.

Rudy Frank tabata den eilandsraad cu asiento di AVP y e resultado a pone cu peticion a ser haci riba dje di parti di AVP pa entrega e asiento na nan "ya cu e no tin

derecho mas riba dje".

Ex diputado Delwyn Gomez cu tambe a forma RUBA cu Watty Vos saliendo di MEP, a cay di 547 voto pa 177 y e tercer lider di RUBA Mr. Ralph Richardson cu tambe a bandona MEP a cay di 622 pa 252.

Janchi Tromp no a logra mas cu 112 voto apesar di popularidad di su programa radial "Lo Exclusivo".